

TOMKE

Jierferslach 2015

Tema: Hoi Tomke • Jiergong 19



FRYSK

NLD

Ynhâldsopjefte

Foaropwurd	3
<hr/>	
1. Algemiene ynformaasje oer de doelstelling en organisaasje fan it Tomke-projekt	4
Wa is Tomke? Wat is it Tomke-projekt?	4
Materialen foar pjutten en opfieders	4
Ynformaasje foar professionals	5
Organisaasje fan it Tomke-projekt	5
Finansiering	6
<hr/>	
2. Ferslach oer de aktiviteiten sa't dy konkreet yn 2015 plakfûn hawwe	7
Tema 'Hoi Tomke'	7
Aktiviteiten foar en mei pjutten	7
Ynformaasjeoarsjenning en materialen foar professionals	9
Materialen foar pjutten en opfieders	11
<hr/>	
3. Leden fan de Tomke-wurkgroep 2015	13
<hr/>	
4. Tomke finansjeel ferslach 2015	14
<hr/>	
<i>Taheakke 1</i> Oersjoch fan de partisipearjende organisaasjes	15

Foaropwurd

Sûnt 1996 wurdt mei it Tomke-projekt wurke oan taal- en lêsbefoarding yn Fryslân. Doel is de Frysktalige lêskultuer dy't bern yn de ierskoalske leeftyd omjout, te befoarderjen. Mei help fan it Tomke-projekt krije âlden en oare opfieders aktueel en oansprekkend Frysk materiaal yn hannen, in wichtige betingst as it giet om it ta stân bringen fan in meartalige omjouwing. Uteinlik sil dit de taalûntwikkeling en it lêsgedrach fan de bern stimulearje, sawol yn it Frysk as yn it Nederlânsk.

Hieltyd wer docht bliken dat de Tomke-materialen yn in ferlet foarsjogge en posityf wurdearre wurde (sjoch ek it Tomke ynventarisasjêundersyk fan Nynke Anna Varkevisser út 2014). Fuortsetting fan it projekt liket dan ek fan krusjaal belang foar it ta stân bringen fan in oantreklike, meartalige omjouwing.

De Tomke-wurkgroep betanket alle subsydzjejouwers en elkenien dy't op hokker wize dan ek bydroegen hat, foar harren bydrage. Sûnder de grutte ynset fan ferskate organisaasjes en sûnder de finansjele stipe kin Tomke gjin aventoeren belibje en kin it Tomke-projekt net de needsaaklike hânfetten en ympulzen fersoargje dy't nedich binne foar in meartalige omjouwing. Wy binne bliid om jo hjirby it ynhâldlik ferslach en de finansjele ferantwurding oan te bieden.

De koördinatoaren fan it Tomke-projekt,

Gertrud Palstra (BSF)

Carolien ter Schuur (Afûk)

1. It Tomke-projekt

Wa is Tomke? Wat is it Tomke-projekt?

It Fryske Tomke-foarlês- en taalstimulearringsprojekt, it Tomke-projekt, hat dizze namme om't alle materialen en aktiviteiten basearre binne op ferhalen oer de pjut Tomke. Tomke is in jonkje fan trije jier dat allegearre aventoeren belibbet mei syn hûntsje Romke, Kornelia de Kangaroo (mei har boekebûdel) en it buorfamke YanaYu. Se prate allegearre Frysk.

It Tomke-projekt rjochtet him op bern fan 2 oant 4 jier en harren opfieders. It projekt wol âlden en liedsters fan pjutten ynformearje oer it brûken fan taal yn 'e omgong mei jonge bern. Foarlêze, ferskes sjonge, (taal)spultsjes en oandacht foar de deistige saken binne wichtich foar it lizzen fan in goede taalbasis. Dat jildt foar alle talen, dus ek foar it Frysk: bern dy't harren memmetaal goed behearskje, kinne makliker in oare taal leare. Ut ferskate wittenskiplike ûndersiken docht bliken dat lêsbefoarding in goede taalûntjouwing ta gefolch hat. In goede taalûntjouwing en meartaligens hawwe in geunstige ynfloed op de kognitive en sosjaal-emosjonele ûntwikkeling. Goede taalfeardigens hat ek in positive ynfloed op it sukses op skoalle. It Tomke-projekt hat as doel de Frysktalige lêskultuer dy't

bern yn de foar- en ierskoalske leeftyd omjout, te befoarderjen om úteinlik de taalûntwikkeling en it lêsgedrach fan de bern te stimulearjen, likegoed yn it Frysk as yn it Nederlânsk.

Materialen foar pjutten en opfieders

In wichtige opdracht foar it Tomke-projekt is it ûntwikkeljen en oanbieden fan Frysktalich materiaal dat yn in meartalige foarskoalske omjouwing brûkt wurde kin. Oer it generaal hawwe bernsintra en gastâlden net in soad middels foar materiaal en (by)skoalling as it giet om it kreëarjen fan in Fryske taalomjouwing. It Tomke-projekt foarsjocht dêryn. Troch it (foar)lêzen yn de Fryske taal en it brûken fan eigentiidske materialen, wurdt in ferantwurde basis lein foar de taalûntwikkeling fan pjutten. Dat jildt net allinnich foar Frysktalige bern, ek by net Frysktalige bern hat bliken dien dat dizze oanpak goed wurket om op in noflikke wize yn 'e kunde te kommen mei de Fryske taal. It materiaal noaget út om fuort te brûken. Dat befoarderet de akseptaasje by it grutte publyk en it brûken dêrfan as middel foar taalûntwikkeling yn

in meartalige omjouwing. De ferskate uteringen, lykas it Tomke-boekje, de tv-aventoeren en de Tomke-weBSITE, binne yn hâldlik op inoar ôfstimd. Dat befoarderet werkenning en makket de akseptasje sterker.

Ynformaasje foar professionals

Foar liedsters, meiwurkers en oare professionals dy't harren dwaande hâlde mei it jonge bern binne der de jierlikse Tomke-ynspiraasjejûnen, de Tomke-nijsbrievien en de Tomke-weBSITE 'www.tomke.nl'. De ynspiraasjejûnen binne ornearre foar it oerdragen fan kennis. De Tomke-nijsbrief befettet ynformaasje oer aktiviteiten en nije materialen. Boppedat is ek de Tomke-weBSITE in wichtige ynformaasjeboarne.

Organisaasje fan it Tomke-projekt

It Tomke-projekt wurdt struktureel folge en troch ûntwikkele troch in gearwurkingsferbân fan ferskate organisaasjes, dy't der tiid, minsken en jild ynstekke. It projekt stiet ûnder tafersjoch fan it PLF (Platfoarm Lêsbefoarding Fryslân).

De algemiene projektkoördinaasje is in mienskiplike ferantwurdlikheid fan de Afûk en de Bibliotheekservice Fryslân. Dêrby hat de BSF in algemiene koördinearjende taak, fersoarget de subsydje-oanfragen, it jierferslach

en de finansjele ferantwurdling. Boppedat nimt BSF it inisjatyf foar it Tomke-biblioteekprogramma foar de biblioteken.

De Afûk koördinearret de ûntwikkeling en produksje fan de materialen, ûnderhâldt de kontakten mei de ferskate doelgroepen en fertsjintwurdigers fan de ynstellingen dy't by it Tomke-projekt belutsen binne, fersoarget de korrespondinsje en de notulen, hâldt de fuortgong yn de gaten en ynspirearret de minsken fan de wurkgroep. Foar de útfiering fan it projekt is in wurkgroep aktyf. Dizze wurkgroep komt 6 kear yn it jier byinoar en draacht yn grutte mate by ta in goede ôfstimming en kontinuïteit fan de ferskate aktiviteiten. De Tomke-wurkgroep bestiet út fertsjintwurdigers fan de partisipearjende organisaasjes. De BSF leveret de foarsitter foar dizze wurkgroep, de Afûk fersoarget it sekretariaat. Troch de kontinuïteit yn de útfiering, wurdt it Tomke-projekt op hannen droegen – troch pjutten, âlden, pakes en beppes, gastâlden en liedsters fan de bernsintra. Binnen it projekt wurde regelmjittich nije materialen ûntwikkele en beskikber steld oan bernsintra, gastâlden, biblioteken en thús. Haadstik 3 jout in oersjoch fan de leden fan de wurkgroep. Taheakke 1 jout in oersjoch fan de partisipearjende organisaasjes.

Finansiering

Yn 2015 ûntfong it Tomke-projekt subsydzje fan de Provinsje Fryslân en hast alle gemeenten yn Fryslân, te witten;

- Achtkarspelen
- het Bildt
- Dantumadiel
- De Fryske Marren
- Dongeradeel
- Ferwerderadiel
- Heerenveen
- Kollumerland
- Leeuwarden
- Leeuwarderadeel
- Littenseradiel
- Menameradiel
- Opsterland
- Súdwest-Fryslân
- Tytsjerksteradiel

By de oanfragen foar subsydzje by gemeenten is de hichte fan it oanfrege bedrach basearre op it tal ynwenners fan de oanbelangjende gemeente. Boppedat waard ek troch de Afûk, BSF en Omrop Fryslân in finansjele bydrage levere. Yn haadstik 4 fine jo it finansjele ferslach en ferantwurding oer 2015.



2. Ferslach fan it jier 2015

Tema ‘Hoi Tomke’

It tema foar 2015 wie ‘Hoi Tomke’. Dat betsjut dat de pjut sels as kapstok brûkt is foar de ferhalen yn de Tomke-boekjes en alle oare aktiviteiten.

Krekt as yn foargeande jierren binne der binnen it Tomke-projekt trije ynfalshoeken te ûnderskieden, dat binne aktiviteiten foar en mei pjutten, aktiviteiten foar en mei opfieders (âlders en professionals) en it ûntwikkeljen fan materiaal foar in meartalige omjouwing yn de foarskoalske perioade.

Aktiviteiten foar en mei pjutten

- De Fryske Foarlêswike
- Tomke yn de biblioteken;
 - Nationale Voorleesdagen
 - Tomke-Toer
 - mei Tomke op de foto
- Tomke op ‘e telefyzje
- * Tomke-radio
- Foarstelling ‘Lekker ite’
- Tomke-app
- Tomke-website

De Fryske Foarlêswike

Begjin juny is het foarlêsbboekje ‘Hoi Tomke’ ferskynd. Dat boekje waard foarlêzen en fergees útdield tidens ‘De Fryske Foarlêswike’. Yn de perioade fan 1 juny o/m 5 juny 2015 waard yn 20 gemeenten, ferspraat oer 368 (2014: 363) bernsintra foarlêzen. De measte bernsintra ha mear as ien groep. Mei-inoar is der oan 717 (2014: 700) groepen foarlêzen. Yn in protte gemeenten wie it resultaat 100% dat wol sizze dat alle bernsintra meidien hawwe. Ek is der by 549 gastâlden (2014: 256) foarlêzen.

Yn 2015 is foarlêzen oan goed 12.500 (2014: 12.400) pjutten, ynklusyf 450 (2014: 600) ‘ukken’ yn de Stellingwerven. It Selskip foar Fryske Tael en Skriftekennisse organisearre it foarlêzen en it útdielen fan de Tomke-boekjes yn De Fryske Foarlêswike. Om it foarlêzen mooglik te meitsjen, wienen der mar leafst 520 entûsjaste foarlêzers aktyf (en 549 gastâlden). In team fan 50 kontaktpersoanen keppele per gemeente de foarlêzers oan de ferskate lokaasjes.

Tomke yn de biblioteken

Fan it begjin fan it Tomke-projekt ôf binne de Fryske biblioteken behelle by it Tomke-projekt. Tusken it geweldich grutte Nederlânsktalige oanbod fan de lanlike programma's hat Tomke yn de biblioteken syn eigen plakje fûn.

By ferskate aktiviteiten foar de foarskoalske perioade waarden Tomke-materialen brûkt en/of útdield.

Tidens de Nationale Voorleesdagen yn jannewaris 2015 koenen de pjutten mei harren âlden of pakes en beppes yn de bibliotek it boekje 'Tomke nei de bibliotek' ophelje. Der waarden mar leafst 5.050 útdielboekjes fergees ferspraat. Tidens dizze aksje waarden âlden ynformearre oer meartalich grutbringen en de mooglikheid bern oant 18 jier fergees lid te meitsjen fan de bibliotek.

Yn de moannen jannewaris o/m maaie hat de Tomke-Toer plakfûn. Tidens dizze Toer kamen de spylsters Riemkje Pitstra en Jetske Miedema mei harren foarstelling 'Lekker ite' by de biblioteken del. Mar leafst 26 biblioteken ha dielnommen oan dizze toer. Alle bern krigen nei ôfrin in moaie Tomke-kaart mei dêrop in opsiferske.

Tidens it Fertel & Foarlês Festival waard it Tomke boekje 'Hoi Tomke' ek yn de biblioteken oan de jongste besikers útdield. Boppedat waard der yn dizze perioade troch alle bibliotekklusters de aktiviteit 'Mei Tomke op de Foto' organisearre. Dêrfoar waarden libbensgrutte Tomke-kostûms mei in heech 'aaiberensgehalte' ynset. Sawol troch de bern as harren âlden waard dizze aktiviteit tige wurdearre. Fansels waard der ek in protte foarlêzen.

Tomke op de telefyzje

Foar de telefyzje waarden 18 nije Tomke-ferhaaltsjes skreaun troch Riemkje Pitstra en Auck Peanstra. Luuk Klazenga fersoarge de yllustraasjes en de stimmen waarden ynspurtsen troch Tamara Schoppert en Douwe de Bildt. Feije van der Meer fan Omrop Fryslân fersoarge de opnames en hie de einredaksje yn hannen. De nije Tomke-ôfleverings waarden útstjoerd yn en om De Fryske Foarlêswike hinne. Yn de rest fan it jier wienen alle wykeinen (Tomke-tiid) werhellingen fan de Tomke-ôfleveringen te sjen bij Omrop Fryslân. Dit is in programma foar pjutten mei Tomke yn de haadrol.

Tomke-radio

Op 18 oktober 2015 is Tomke-radio lansearre. Fan dat momint ôf is Tomke-radio alle dagen beskikber. De hiele dei binne der sawol ferskes as ferhaaltsjes te hearren. Moarns ferskes en ferhaaltsjes foar de lytste bern en middeis ferskes en

ferhaaltsjes foar de wat gruttere bern. En om bêdtiid hinne binne der in oere lang ferhaaltsjes te hearren. Tomke-radio is te finen by Omrop Fryslân, fia de site www.tomke.nl en fia de sites fan de Fryske Bilblioteken.

Foarstelling 'Lekker ite'

De foarstelling mei Tomke yn de haadrol slút oan by de wrâld sa't pjutten dy belibje. Yn de foarstelling hat Tomke fertriet want buorfrou Swietbek docht sa nuver. Se docht oars allegearre fleurige dingen mei him: hutte bouwe, boekje lêze, fuotbalje. No sit se mar wat op 'e bank en wol neat mear.

Tomke wol har helpe. Hy giet nei Kokky. Miskien kin dy lekker iten foar syn buorfrou meitsje. Tomke mei Kokky helpe yn 'e keuken. Se dogge o sa harren bêst, mar buorfrou fynt neat oan de ferrassing! Hoe komt it dochs dat se net ite wol? Dêr komme Tomke en Kokky gau achter. Gelokkich kinne se buorfrou wer fleurich en fit krije.

De foarstelling duorret likernôch 30 minuten en kin spile wurde yn boarterslokalen fan bernedeiferbliuwen, pjutteboartersplakken, biblioteken ensfh. De bern wurde aktyf belutsen by it ferhaal. Yn 2015 is de foarstelling 80 kear spile.

Tomke-app

Geskikt foar de tablet is de Tomke-app. De Tomke-app is fergees en beskikber foar de iPad en foar Android. De app is bedoeld foar pjutten en bestiet no út 6 Tomke-boekjes op rym. De bylden bewege en it ferhaal wurdt foarlêzen. Nei elk ferhaal kin it bern in spultsje dwaan.

Tomke-website

Op de Tomke-website (www.tomke.nl) is in spesjaal ûnderdiel foar pjutten opnaam. Hjir kinne pjutten spultsjes dwaan en nei lietsjes of ferhaaltsjes harkje.

Ynformaasjefoarsjenning en materialen foar professionals

- Tomke-nijsbrief
- Tomke-ynspiraasjejûnen
- Website www.tomke.nl
- Tomke en de Sânglêsrige

Tomke-nijsbrief

De nijsbrief foar professionals ferskynde yn 2015 trije kear. De nijsbrief waard yn in oplage fan 1250 stiks ferstjoerd nei alle bernsintra en de jeugdkonsulinten fan de biblioteken. De nijsbrief ynformearre harren oer aktiviteiten, nije materialen en oare saken oangeande Tomke en foarskoalske ûnderwerpen.

Tomke-ynspiraasjejûnen

De ynspiraasjejûnen binne in ûnderdiel fan de aktiviteiten fan de Tomke-wurkgroep. De einferantwurdlikheid foar de organisaasje wie yn hannen fan Cedin. De jûnen binne spesjaal bedoeld foar liedsters fan bernsintra en oare professionals. De jûnen stienen yn it teken fan it tema 'Hoi Tomke' en fûnen plak op 15 april yn Stiens (kultureel sintrum de Skalm) en op 22 april yn Drachten (brede skoalle De Wiken).

It programma bestiet út de folgjende ûnderdielen:

- Iepening troch Anne Graswinkel (Tryater) mei in ynteraktive lêzing oer it stimulearjen fan drama by bern.
- In taljochting op de aktiviteiten binnen it Tomke-projekt troch de Afûk.
- In ynformaasjemark.
- Twa workshops, dat wienen: 'berneyoga' troch Christa de Vries (praktijk voor kinderyoga & begeleiding) en 'dûns en muzyk' troch Willy van Assen (Danswil).

Alle dielnimmers krigen nei ôfrin in goodybag. De jûnen waarden posityf wurdearre, út de evaluaasje hat bliken dien dat de besikers net leger as it sifer '8' jûn hawwe. It tal besikers wie 47.

Website www.tomke.nl

De Tomke-webside (ek te brûken op in tablet) wurdt gemiddeld troch 1000 unike besikers yn 'e moanne besocht. De webside bestiet út spultsjes, lietsjes en ferhalen foar de bern en ynformaasje foar âlden en professionals. De webside rjochtet har op taal- en lêsbefoarding. De webside wurdt kontinu by de tiid holden en de ynhâld fan bygelyks spultsjes, ferhalen, kleurplaten, wurkblêden en taalaktiviteiten wurdt geregeld oanpast oan ferskate tema's dy't passe by de tiid fan it jier en tema's dy't brûkt wurde op bernsintra. Fia de webside wurde digitale nijsbrieven ferstjoerd en is der nijs oer Tomke. Fia de Tomke-Facebookpagina binne der goed 1400 minsken dy't regelmjittich nije berjochten fan Tomke krije. De Pinterest-side fan Tomke hat 100 folgers

Tomke en de Sânglêsrige

De Tomke-wurkgroep naam yn 2003 it inisjatyf om te kommen ta de útjefte fan Frysktalige temabrosjueres. Dêrút ûntstie de Sânglêsrige as totaalprogramma foar pjutteboartersplakken, mei omtinken foar taalûntwikkeling, motoryk en oare ûntwikkelingsgebieten.

Nei goed 10 jier wie de Sânglêsrige oan ferfanging ta. Yn 2015 is dêrom wurke oan de ûntwikkeling fan nij Tomke-materiaal dat yn 'e rin fan 2016 beskikber komt. Dit nije materiaal is sa makke dat it as oanfolging op lanlik

VVE- materiaal ynset wurde kin, benammen op de programma's UK&PUK en Piramide, de yn Fryslân meast brûkte (Nederlânsktalige) VVE-programma's. Fan dy oanfolling is ferlet omdat de lanlike metoaden net ôfstimd binne op de meartalige sitewaasjes sa't dy yn Fryslân bestiet.

De Sânglêsrige is yn 2016 net mear beskikber.

Materialen foar pjutten en opfieders

- Tomke-boekje 'Tomke nei de biblioteek'
- Tomke-boekje 'Hoi Tomke'
- Tomke-poster
- Heit&mem

Tomke-boekje 'Tomke nei de biblioteek'

Tidens de Nationale Voorleesdagen yn jannewaris 2015 waarden troch de biblioteken 5.050 eksimplaren fan it boekje 'Tomke nei de biblioteek' fergees útdield oan de jongste biblioteekbesikers. It boekje bestie út in ferhaal, in opsiferske en in spultsje. Diskear wie Auck Peanstra de skriuwster, Luuk Klazenga fersoarge de yllustraasjes.

Tomke-boekje 'Hoi Tomke'

Tidens De Fryske Foarlêswike is it Tomke-temaboekje útdield. It foarlêskboekje ferskynde yn in Frysktalige, in Stellingwerfse en Skiermûntseagerske ferzje mei fjouwer ferhaaltsjes en twa stripferhalen. Boppedat hie it foarlêskboekje wer in protte yllustraasjes, opsiferskes, lietsjes, spultsjes, in praatplaat en in kleurplaat. Der wie ek ynformaasje yn opnommen oer it Tomke-projekt, Fryske printeboeken en oare media. It 28 siden tellende boekje waard foarmjûn yn de karakteristike Tomke-styl troch Monique Vogelsang. Krekt as foarhinne soargen de skriuwsters Auck Peanstra en Riemkje Pitstra foar de ferhaaltsjes. Lietsjes en ferskes wienen fan Geartsje Douma. De yllustraasjes waarden fersoarge troch Luuk Klazenga en Linda de Haan.

It Tomke-boekje ferskynde begjin juny en waard fergees distribuearre fia it netwurk fan de biblioteken en konsultaasjeburo's. It grutste part waard útdield troch de foarlêzers tidens De Fryske Foarlêswike. De oplage wie foar de Fryske ferzje 27.000 eksimplaren, 1.000 yn it Stellingwerfs en 350 yn it Skiermûntseagersk.

Tomke-poster

De Tomke-poster mei dêrop de yllustraasje fan de foarkant fan it Tomke-boekje, makke wer diel út fan it oanbod. Dit jier waarden de posters ek wer ophongen yn biblioteken, bernsintra, wachtkeamers, konsultaasjeburo's, gemeentehuzen en buerthuzen.

Boppedat ha de bernsintra dy't meidien hawwe oan de Fryske Foarlêswike yn oparbeidzjen mei it Selskip foar Fryske Tael en Skriftekennisse in úttearposter krigen dy't oansleat by it Tomke-Temaboekje.

Heit&mem

Heit&mem is in twatalich (Frysk en Nederlânsk) tydskrift foar jongen âlden. Yn 2015 brocht de Afûk trije nûmers fan heit&mem út. Ien nûmer (de lytse heit en mem) waard fia it Taaltaske ferspraat, 2 (reguliere) nûmers waarden rûnom yn Fryslân ferspraat op mear as 400 plakken lykas biblioteken, sikehûzen, basisskoallen en bernsintra. Neist it blêd is der ek in site mei de namme 'heitenmem'.

Dizze site – www.heitenmem.nl – hat sa'n 20.000 besikers yn 'e moanne. It blêd en de site jouwe ek ynformaasje oer it Tomke-projekt en oer it meartalich grutbringen fan bern.

3. Leden fan de Tomke-wurkgroep

Yn 2015 bestie de wurkgroep út de folgjende leden:

- Gertrud Palstra / Bibliotheekservice Fryslân, koördinaasje
- Carolien ter Schuur / Afûk, koördinaasje
- Lineke Kuiper / Afûk
- Riemkje Pitstra / ûnderwiiskundige
- Mirjam van der Hoek / SFBO
- Mieke Vos / Cedin
- Feije van der Meer / Omrop Fryslân



4. Tomke finansjeel ferslach 2015

		jaarrek. 2015	begroting 2015	jaarrek. 2014
Lesten				
Materiaal	Tomke-boekjes, Frysk, Stellingwerfs, Skiermûntseagersk	15.132	14.000	14.853
	Oare Tomke-materialen	962	5.500	1.755
Eveneminten	Telefyzje-útstjoerings	35.590	57.500	33.640
	Tomke-yndspiraasjejûnen	1.957	16.500	14.526
Distribúsje	Kosten fan fersprieding	229	2.000	138
	Jierferslach	244	0	309
Organisaasje	Burokosten / projektkoördinaasje Afûk	12.017	15.000	12.200
	Ekstra oeren Afûk	4.537		3.730
	Burokosten / projektkoördinaasje BSF	13.447	8.000	9.455
	Finansjele begelieding	1.500	1.500	1.500
	Unfersjoen	449		204
		86.065	120.000	92.310
Baten				
Subsydzjes	Subsydzje Provinsje Fryslân	25.000	25.000	24.990
	Subsydzje Gemeenten	26.454	25.000	25.353
		51.454	50.000	50.343
Materiaal	Ferkeap Tomke-materialen	1.207	3.000	1.727
Eveneminten	Entree dielnimmers Tomke-yndspiraasjejûnen	875	1.000	963
Organisaasjes	Eigen bydrage dielnimmers	32.529	66.000	40.208
		86.065	120.000	93.241

Taheakke 1 Partisipearjende organisaasjes

Platfoarm Lêsbefoarding Fryslân (PLF)

It PLF is in oerkoepeljend orgaan yn de provinsje Fryslân, mei as doelstelling it stimulearjen fan ûnderlinge gearwurking. De kearnzaak fan it PLF is it koördinearjen fan projekten foar taal- en lêsbefoarding.

It PLF wol him ynsette foar in meartalich lêsklimaat yn de hiele provinsje en fungearret dêrby as oansprekpunt foar subsydzjeferlieners, polityk en beliedsmakkers. De lanlike Stichting Lezen – in wichtich pleitbesoarger foar de twadde rykstaal – nimt ek diel yn dit oerlisorgaan. Fan it PLF út wurde subsydzje-oanfragen yntsjinne en de fuortgong fan it Tomke-projekt yn 'e gaten holden. De BSF fersoarget it sekretariaat fan it PLF.

Afûk - www.afuk.nl

De Afûk hat as misje de Fryske Taal en Kultuer ticht by de minsken te bringen. Dêrfoar set de Afûk ferskillende middels yn, sa as: it oanbieden fan kursussen Frysk, it ûntwikkeljen en beskikber stellen fan Frysktalich materiaal en it (meiwurkjen oan it) organisearjen fan aktiviteiten wêrtroch de foardielen fan meartaligens yn it algemien en de kulturele wearde fan de Fryske taal yn it bysûnder

ûnder de oandacht brocht wurde.

Binnen it Tomke-projekt soarget de Afûk benammen foar it ûntwikkeljen en produsearjen fan materialen en it ûnderhâlden fan kontakten mei de doelgroepen en organisaasjes. Dizze wurkwiize soarget foar effisjinsje en befoarderet de gearhing mei oare programma's.

Bibliotheekservice Fryslân - www.debsf.nl

De BSF stipet as provinsjale serviceorganisaasje de Fryske biblioteken by it útfieren fan harren wurk troch it dwaan fan fasiliteere tsjinsten, it ûntwikkeljen en oanbieden fan nije produkten en tsjinsten en troch lanlike projekten op provinsjale en lokale skaal oer te setten. De BSF fiert in aktyf belied om it lêzen yn it Frysk te befoarderjen.

Binnen it Tomke-projekt hat de BSF benammen in koördinearjende rol. It finansjele part fan it Tomke-projekt (fersoargjen fan de jierferslaggen, subsydzje-oanfragen) is by BSF ûnderbrocht. De Tomke-aktiviteiten foar de biblioteken wurde troch BSF opset en koördinearre. It ferfier fan de ferskate Tomke-boekjes nei de biblioteken wurdt ek troch BSF regele.

De gearwurkjende biblioteken yn Fryslân FBN

De provinsje telde yn 2015 fiif biblioteekklusters;

- 1 Noard Fryslân
- 2 Mar en Fean
- 3 Midden-Fryslân
- 4 Súdeast Fryslân
- 5 Smellingerlân

Fan dizze organisaasjes út wurde de biblioteken (filialen), mediateken en lytse bybs oanstjoerd. Binnen it Tomke-projekt spilet it netwurk fan biblioteken in rol by de distribúsje fan de Tomke-materialen, aksjes om Tomke hinne, it jaan fan ynformaasje oer meartalich opfieden oan âlders en fansels it beskikber stellen fan (foar)lêsmateriaal.

CEDIN Taalsintrum Frysk – www.cedin.nl

Taalsintrum Frysk is in ûnderdiel fan Centrum voor Educatieve Diensten CEDIN. Hja hâlde har benammen dwaande mei meartalich taalbelied en stribje dêrby nei in lykwaardige posysje fan de Fryske taal.

Binnen it Tomke-projekt tinkt CEDIN ûnder oare mei oer edukative aspekten fan it Tomke-barren en wie hja einferantwurdlik foar de ynspiraasjênen.

Sintrum Frysktalige Berne-Opfang (SFBO)

It SFBO is it ynformaasje-, kennis- en stipepunt op it mêd fan meartaligens en taalstimulearring yn de foarskoalske perioade. De provinsje Fryslân stelt SFBO yn de gelegenheid om pjutteboartersplakken en bernedeiferbliuwen te stypje by it ûntwikkeljen fan in Frysk- of twatalich taalbelied.

It SFBO hat in permaninte fertsjintwurdiger yn de Tomke-wurkgroep. Har ynbring soarget der mei foar dat de ûntwikkele materialen goed oanslute by it ferlet fan de pedagogyske meiwurkers.

Omrop Fryslân – www.omropfryslan.nl

De regionale telefyzje fersoarget nijs en ynformaasje út en oer Fryslân, makket eftergrûnprogramma's, ûntspanning en muzyk. Foar bern is der alle jûnen in spesjaal programma. Yn gearwurking mei CEDIN fersoarget Omrop Fryslân skoalle-útstjoerings foar radio en telefyzje. Binnen it Tomke-projekt fersoarget de Omrop it ûntwikkeljen en útstjoeren fan de Tomke-ôfleveringen op telefyzje. Sûnt 18 oktober 2015 fersoarget de Omrop Tomke-radio.

Selskip foar Fryske Tael en Skriftekennisse

'It Selskip foar Frysk Tael en Skriftekennisse' stipet de Fryske taal en kultuer. Yn gearwurking mei de Tomke-wurkgroep wol it 'Selskip' it lêzen en it foarlêzen in stimulâns jaan. It soarget dat foarlêzers en boartersplakken mei inoar yn kontakt brocht wurde. Foar de foarlêzers wurde foarlêskursussen organisearre.

Alle jierren organisearret It Selskip tidens it FFFestival 'De Fryske Foarlêswike'. De foarlêswike is in gearwurkingsprojekt tusken It Selskip en it Tomke-projekt. It doel fan it projekt is om alle jierren yn dy wike foar te lêzen oan pjutten op pjutteboartersplakken, berneideiferbliuwen en biblioteken. De organisaasje fan it foarlêzen leit yn hannen fan It Selskip. De materialen (boekje, poster, pr-materiaal) wurde fersoarge troch it Tomke-projekt.

De thússoarch-organisaasjes

De thússoarch-organisaasjes binne behelle by de soarch foar konsultaasjeburo's, begelieding, kontakten en kursussen. Hja binne der foar mem en bern. Binnen it Tomke-projekt spylje hja in rol yn it berikken fan jonge âlden troch distribúsje fan it Tomke-boekje.



